

主編 黃靈庚 陶誠華

上海古籍出版社

金華宗譜文獻集成
18

主編 黃靈庚 陶誠華

上海古籍出版社

金華宗譜文獻集成

18

目錄

金華宗譜文獻集成(浦江宗譜三) 浦江縣委宣傳部編

陳舒平輯

邵

一

浦陽嵩溪邵氏宗譜

一

沈

三七

浦陽冠山沈氏宗譜

三七

石

七一

浦陽石氏宗譜

七一

盛

一〇五

羅源盛氏宗譜

一〇五

王

一二九

新安王氏宗譜

一二九

沙溪王氏宗譜

一四三

吳

一五九

吳溪吳氏宗譜

一五九

徐

一九七

嵩溪徐氏宗譜

一九七

席

二五七

浦陽席氏宗譜

二五七

于

二六七

浦陽于氏宗譜

二六七

楊

二八七

龍溪楊氏宗譜

二八七

嚴

三一九

橫崗嚴氏宗譜

三一九

張

三七一

龍溪張氏宗譜

三七一

柳溪張氏宗譜

四〇六

平安張氏宗譜

四四六

鄭

四九七

麟溪鄭氏宗譜

四九七

鍾

五二三

龍溪鍾氏宗譜

五二三

朱

五三九

浦陽朱氏宗譜

五三九

邵

浦陽嵩溪邵氏宗譜

譜序

氏族之有譜何也自先王尊祖敬宗教民親睦之道不衍於世所以繫人心而厚氏彝立政本敦教源者猶有賴於譜書之作也譜法行則人得以知其本之所自出而尊其尊詳其支之所由分而親其親尊尊親親人道備矣同鄉太尹公邵志遠持其世系以告予曰志遠固平原之望族也自宋末千十府君由嚴陵桐廬遷浦感德之嵩溪迄今六世矣遠而邈者無所徵近而親者尚可攷失今不編將泯然無聞謹法諸史表禮圖以爲系傳庶俾百世而有所稽也願請一言簡諸篇端夫謹家牒而不忘乎先允矣尊祖展也敬宗邵公洵知所重哉嗟夫自譜書廢而親誼衰將富不齒貧貴不齒賤故有喜不慶憂不弔歲時伏臘不相與會茫然如途人欲合親疏爲一體惟藉譜牒之存爾此邵公之所倦倦於茲也公之先世以詩禮名家嚴君以正直著鄉賢昆仲以孝友膺仕同居共爨合數百指雍雍睦睦纖無閒言而公退休閑克篤家訓務先乎親睦之行經緯是圖上下五六世未嘗有所援附視夫世之矯名千譽誇門第以炫詡人者大不侔也引而申之繩繩不已逾傳逾遠即數百年之下展卷而觀有以見其支分派殊皆本一人之身呼吸喘息氣與之通憂樂忻戚情與之

聯不至汎汎焉如鳬鷖魴鮪之在河譜之所係不既重歟夫尹公余家女姊之配雅性清逸不嗜祿利素協壘簞奮庸立功著業光兆先德者厥功偉矣予故樂而爲之序時明永樂五年丁亥春上巳之望國子監翰林院檢討義門眷弟鄭棠拜撰

邵氏宗譜後序

浦陽嵩溪之有邵氏宋處士諱正鸞字世瑞始遷二世生直諒諒生顯宗宗生統龍統虎皆以雍睦守安樂之素統虎生天宜幼而穎異超凡長則通明公溥生二子志道志遠並以孝友聞於朝洪武二十五年擢選志道湖廣巡按御史志遠山東濟南府濱州蒲臺知縣既而退休永樂元年復選廣東潮州海陽知縣肇編家乘以垂後範六世以上不可知者姑闕而不書蓋慎之以傳信也六世以下名氏品行坵壠顯晦悉備於圖而詳於解禮請翰林檢討鄭棠序其端復徵予言識於後予與邵公志遠南北鄰而篤姻誼者也烏容已於言竊維草木之有花譜器樂之有琴譜其他若書譜畫譜之類世且尚之矧族譜乎設或不修將何以知本始明世序隆愛敬廣敦睦勿至途人之歸者幾何哉故仁人孝子之心先務於斯若邵公者洵謂知本敬宗而稱仁孝矣彼受姓轉遷與夫修輯之概諸公述之於前不容復贅惟邵氏之後賢思光裕之烈而善繼述焉慎之勉之是序諸後時永樂歲次丁亥春穀旦欽授河南懷慶府武陟知縣婣家眷弟柳富頓首拜撰

邵氏重修譜序

凡人所以不墮先人之體以其知尊祖敬宗之道也蓋尊敬之道有四立家廟修墓田睦族人尊宗譜而譜牒正先王所遺之法尤爲要也惟能修家譜始能睦族人而可以立家廟修墓田不然則爾爲爾我爲我族人莫識其名祖宗罔知所出墓田勿曉其原嫁娶不識其家雖有是心而亦不能推行故輯修宗譜實爲光裕第一籌吾每歎故家巨族支派蔓延彼強此弱以至世代踈遠容有未嘗識面者甚至姪乘軒而叔避途尊卑無等貌如路人噫何忍祖宗一體而分者至於如是乎蓋由譜牒之未輯也余家譜牒幸六世祖海陽公編始既而三修之又復五十餘年矣脫今不續則前弊恐難免之且文華之遠祖邇宗自宋元至明歷有顯達者而其要則以輯宗譜睦族人立家廟修墓田之事爲最故合嵩蘭昆季延世之明士傅思序董厥告竣謹書一言以示我後云時嘉靖四十三年甲子冬至日第十二世孫文華撰修文中同識

邵氏重修宗譜序

蓋聞譜者序源流明宗族之書也唐虞三代以來或賜姓命氏或因名因字爲氏或建國分土爲氏氏雖不一而既有姓氏必有源流有源流必有譜牒則萬世之下可以因其末而推其本矣且人之有祖猶木之有本水之有源本固則枝茂源深則流長世之巨族雲初奔葉綿亘無息者豈無自而然耶皆由先世積德之深故能獲慶之遠也邵氏本成周召伯之後加邑爲邵族盛世遠散處寰宇以浙而言

有居於杭州者有居於處州者有居於嚴陵者又有遷於婺之蘭谿與越之暨陽者江南邵姓固衆而族譜相比則一子孫繁衍隱顯殊途千流萬派歷歷相承皆本邵穆之源今嵩溪邵氏實出汝南望族之後遷於嚴州烏龍山後桐江宋末處士諱正鸞者始來遷此是爲第一世祖傳五世孫天宜貞心大度而廉公方正處家衆則怡然翁和訓二子則齊榮競秀長公志道巡撫三楚仲君志遠初任東魯之蒲臺永樂元年復作粵東潮之海陽尹既而解組之餘編集譜牒詳載宗祖之所自來此六修而殘缺於秦炎譜牒磨泯十三世孫余友汝元慨承先志重加訂正上明祖脉下啓孫支宦績幽踪行字婚卒悉詳以續先人之遺緒詩曰無念爾祖聿修厥德汝元之謂與然則邵氏之澤由上積德於前而獲傳芳於下自一世以至百千萬世無窮之傳光華焜耀庸有艾乎吁孝子順孫觀斯譜誦斯言者可以知先世德澤之深而獲慶之遠矣尚勉之哉時崇禎三年庚午秋九月之吉賜進士第文林郎年家眷弟江俞敏拜撰於璧玉齋中

邵氏重修宗譜序

蘭塘邵氏距予家南數十武人文鬱起爲里中儀式嵩溪邵氏則距予家北十里許其地四山環翠兩溪夾流烟居鱗集土沃風淳予之諸姑伯姊多聘字焉實爲蘭塘之所自出歲戊戌予友汝良持嵩溪宗譜告曰家世嵩溪居蘭塘者乃七世祖思八府君始也行字雖別則皆海陽公嫡派於昔嘉靖年間從伯父諱文中會先子文華第五修宗譜謂予考言世行各異遠則難稽勸考秉修譜牒統一族人歲時往還如故越三十六載先兄汝元繼葺於煨燼之秋以防廢逸迄

今又越二十有九年矣。遭時鼎革，兵火日尋，脫不重修，予姓不仍散逸乎？竊爲是懼。會諸叔姪輩延譜師翁君董其事，幸吾兄一言弁諸首，而勿辭。謹按其世系出自烏龍王。後初由淳安諫村再衍於桐廬之鍾山，再自千十府君由鍾山鄉遷浦之嵩溪，傳五葉義一府君聰明正直，沒而爲神。福庇後人，裡祀於鄉。生二子：長寧三公，皇明國初仕湖廣按察御史；次寧五公，皇朝由山東蒲臺知縣改廣東海陽知縣。政績偉多，燦著兩邑。嗣後子姓遷處不一，或樂故址，或愛新居，而有嵩蘭之別。要皆義一府君之後裔。故稱之曰嵩溪宗譜。嗚呼，德厚流長，自古識之。義一公生爲君子，死爲神明。當年寧三、寧五起爲熙朝鉅卿，是食其報裔孫繁衍固其宜也。汝良克念譜係匪細，輯於不甚廢弛之秋，爲力雖多，存心實苦。要出自生平積慮，非徒蹈故者比也。汝良弱冠時，隨伯仲汝通，汝元廬墓三載，讀書作文，刻銘忠孝，所以汝元繼乃考文華公而修於前，汝良仍繼汝元公而修於後。一先一後，總義一府君在天之靈，憑之俟其後者，難忘先德乎？是序時大清順治十五年戊戌夏之吉，赤松蓬道人張國聘拜撰。

重輯邵氏譜序

家之有譜，猶國之有史，以紀政事，譜以別親疏，所係誠非淺鮮。但吾浦著姓，譜牒頗多，求其做史氏之法，極規例之詳，不特可以別親疎，而且可以厚風俗。莫邵氏新輯之譜若矣。考其世系，向籍嚴陵宋末千十公諱正鸞者，攜長子萬一公由烏龍山後桐江鍾山鄉遷浦之嵩溪，及第六世孫志遠、寧五公宦遊之餘，慨然編譜，其派下分爲天地人三房。天地二房，思四思六公仍居嵩溪而行；以南海嶽權叙

人分思八公分居蘭塘而行，以生長茂盛，序迨後十二世乃合而從同。然是譜昉自明永樂丁亥，至本朝康熙戊辰，歷三百餘年，凡八修而條例不無缺畧，編次未免參差。今閱新修底本，有系圖使世派不紊，有行傳俾生卒了然，至婚配之必詳，嗣續之必慎，葬地之必確，行狀墓誌之必錄，而且始紀年號，以尊王末，綴家範，身範以善俗，是以家乘而兼史筆者也。內弟大生向於宗族義舉，知公矢慎，既董理祠事，告竣復草創譜，則以謀校梓，雖襄事多人而秉筆主政，斟酌先賢舊錄，彙序歷代本支，詳核簡要，規模宏遠，斷非異人任矣。壬寅夏，藁成就予參訂，且屬之序。予喜其光大宗祊，以釐定夫一族使殘缺故東煥然改觀，洵不朽之絕業也。爰羅列以弁其首，時大清康熙壬寅年夏六月龍溪張德澧蘭生氏頓首拜撰。

嵩溪邵氏十二修宗譜序

浦江嵩溪邵氏於何昉乎？自召康公封燕，號曰召公，後世子孫增邑爲邵氏。至秦邵博陵封東陵侯，種瓜長安，瓜有五色，世稱東陵瓜。而嵩溪邵氏則其派也。千十公者，嵩溪邵氏之鼻祖也。從嚴陵遷居浦邑之嵩溪，其六世孫海陽公始輯宗譜十五世孫一大生公羅列宗派旁搜遠紹，至詳且悉。庚戌之秋，重修宗譜十七世孫邦春、邦庸諸公鑑定，參校手執譜系，因袁子華蓴而請序於余。余披而閱之，掩卷而歎曰：嗚呼！古人云：開創難守，成不易誠哉！是言也。余觀茲譜自一修再修，至十一修前人之序詳矣，而今則十二修也。其祖父以上則遵守海陽大生二公之規，其祖父以下則詳載子孫曾元長幼之次，其善者則揚之以垂後昆，其否者則隱之以蓋前愆，而絕無慕乎其

外之思也吾因之有感矣世之好榮宗光祖東牽西聯者其與五代之郭崇韜強附汾陽之譜而拜其墓唐之杜正倫求附城南之譜而終不許其相去幾何哉至於近派則糾紛錯雜弟其兄叔其姪一人之身數世之後視爲塗人喜不慶憂不弔是可慨也夫譜者牒也屬也布也布列見其事也故近則詳之遠則畧之何慕外之有焉孟子曰君子創業垂統爲可繼也邵氏有焉大雅云不愆不忘率由舊章邵氏有焉今而後子孫曾元昇初雲耳昭茲來許繩其祖武世世子孫勿替引之可也是爲序時龍飛乾隆五十五年庚戌歲應鐘月中浣三日乙未進士山陰茹敦和拜撰

邵氏重修譜序

余讀詩至甘棠喟然嘆召公之明德遠矣蔭及草木況苗裔耶夫周室以親親之道化天下國脉靈長邁三古焉召公與周公協贊之力也今考邵氏族其源本於召公原宗引內釐然矣雋異之士自周以降名於世者累朝不絕匪獨族繁而顯達抑且有非他姓可攀者茲居嵩溪派合邵氏族計之想必百無一耳而已稱爲浦陽巨族去余居舍三之一其風氣之厚俗尚之淳仰爲仁里也久矣今族長邦震獨殷然以修譜爲務銓公正人等監理是其敦宗睦族之誼若獨根於天性者使然召公去今雖數千百年未嘗不嘆明德之後風教固殊而親親之化之留貽於後人者爲不朽也時興文從余游譜事竣請序之余因稽其世系易曰積善之家必有余慶其說豈果誣耶邵氏族其益懋乃祖德種心田以貽奕葉子孫享保世滋大又曷可量哉是爲序時大清道光五年歲次乙酉小陽月己卯科副榜蘆江氏

金照拜撰

庚子嵩溪邵氏重修宗譜序

夏五月余與同人遊桐廬之唐塢即俗所稱漢孫仲謀祖墓者旅中談及淳安烏龍神之靈應香火幾甲於衢婺諸郡然未暇叩其詳也今閱邵氏宗譜始知子姓之蕃衍其遷居浦陽者特一支耳夫自五季亂而譜局廢自歐蘇起而譜牒興故世之爲譜學者首推歐蘇兩家然而歸震川有言譜者載其族之世次名諱而已使世次名諱之既詳則不必懸定以爲宗法而宗法存焉愚嘗謂世系之圖宜法震川譜例治家之規宜遵朱子家禮凡名門巨族其宗牒之善者無不具得此意若嵩溪邵氏其有焉考邵氏之譜創始於海陽公增編於大生公規模宏遠條置周詳蓋以史法行之者如原宗乘誌所自也叙甲第述祖德也錄孝義重倫紀也存藝文著風雅也立祠規隆孝敬也垂家範身範端教化美風俗也亦可謂體大思精兼古人之長者矣會修譜將歲事左臣兄之內舅國桂實膺校讐之任因囑叙其巔末嗚呼前人之用心如此其勤且至矣後之人遵而守之有不法聲隆隆然科甲聯翩與御史公之剛正海陽公之清節後先濟美哉如是則豈獨爲一邑之望族雖淳安桐廬諸派亦與有光者矣余將於是卜之也是爲序時大清道光二十年庚子季秋下浣乙未恩科舉人芝生陳毓秀拜撰

乙卯邵氏重修宗譜序

余鄉邵氏浦汭巨族也其得姓受氏祖宗源流譜牒規例諸序中詳

哉言之矣余展讀焉見譜例之密編輯之周世系圖考歷歷詳明確當譜法在焉即宗法在焉爲子孫者誠宜遵守而勿失也溯邵氏宗譜始於海陽公開創大生公重編自有明以迄本朝數百年來屢經修輯非曰僅以載其族之世次名諱已也俾後人知祖宗之所自來彝訓之所由傳子姓之所以日蕃衍而不虞散而無稽因得聯而相屬者合在於斯倘任其蠹蛀不勤爲重校將久之亥豕傳訛魚魯混迹非後人之咎而誰咎哉近且約成譜會定以十五年一修蓋取人生十五歲成童之義誠慎之至也茲復屆修輯之期族長國欽謹銓國桂等校讐矢公矢慎不但前人所曾究正者罔或鄰於舛錯無忽無迷且使今日所新釐定者不至偶有紊淆則斯舉也敬宗收族遵法垂型豈止世次行輩生卒葬徙可一望而瞭然也哉國桂公者余之第九姑夫也自道光乙酉至咸豐乙卯計三次校輯與同監理人細心檢閱不遺力不辭勞亦英傑也已譜告竣請序於余余以誼屬葶末愧不能文爰表數言撫實以爲之序時大清咸豐乙卯小陽之吉恩貢生候選儒學眷姪恂齋徐仲堽拜撰

千十府君行傳畧

始祖正鸞字世端生宋理宗戊戌夏午月五日祖居桐江鍾山鄉文祖府君之三子初業儒資性卓犖踰弱冠恃怙俱失訪友尋師而徜徉於山水之間伯仲因從而規之曰弟英俊俊彥不事芸窗乃負劍攜琴放誕於山水者得無爲遊乎公起而對云吾不幸椿萱早逝自愧疎陋不欲以皎皎之軀而蒙物之淄垢與其樂於身孰若無累於心且世將擾擾欲覓吾所托足處耳敢尚以漫遊爲事哉識者雅重

其清操公逆蘭江而之婺歷溫臺以放於吳會之間一駐信宿諸凡名勝鮮有未經其足者再言旋浦躡仙華而識嵩溪之原山盤水遶民樂村稀乃曰是谷也有土可稼有水可清縱有理亂其誰與知之採美釣解快哉吾志斯真堪容膝者矣遂還故里偕安人傅氏及長子萬一公率童僕而肇基於浦之嵩焉六世孫志遠謹撰

義一公傳畧

公諱天宜字維行尚二府君之長子生元至正丁酉六月十八日是歲暘亢三月田禾盡稿於公誕先一日沛澤甘霖公父夕夢神告曰汝家存心善行已經三世明曰善緣使者當至爾善禮之宜昌厥後次日尚二公謂必有鄉之長者至具饌飭衣冠以候抵暮無有叩之者倏然華光東來燦爛庭戶引入室內如晝俄焉公誕旋香輒聞不知何自至也祖父驚異之因乳名馥光長命之曰天宜益力善修以篤後祐聘龍溪張廣文女爲婦公年七歲好學尚古志廣識微逆將來之晴雨知未至之事機慈惠愛親而正直無邪嚴毅庭訓而先人後己篤勵二子聯膺仕進之途取善推功共仰鄉尊之望著有集古嘉行錄二卷垂範公嘗謂凡祖宗有發福子孫必累陰陽以啓之而陰陽之至莫如不報無道雖是稍屈人只謂得我弱且留此間錢作家際此光陰讀書不爲客氣所分亦是自家討便宜處若屑屑與人較是非爭勝負縱使事事取勝於人而自家之元氣損矣公年週甲之臘望夕夢光華燦燦庭出有聲升東橫投西北而隱覺而興曰光隱於西吾年窮矣壽彌六十不爲矢官爵二子不爲賤俛仰無愧不爲辱庶可歸見父母而棲神於祖父之域矣越晨命戒子孫咸集曰

三綱五常不可不修孝弟忠信不可不盡夫人情由儉人奢易由奢入儉難然修己不要自足作家卻要自足是故貪侈者未必便世世享用恬約者未必便個個凍餒所謂君子贏得爲君子小人枉了做小人爾輩謹守吾集古所錄之語勉夫環顧子孫含笑而逝時永樂丙申歲臘之十有七日也嗣後公之威靈隱見如存孫子表立儀像於堂以安之噫公逝雖遠德蔭維新福我子孫世永賴之無極玄孫文華謹撰嗟夫祝融之爲災延及宗籍遂令先祖集古嘉行錄移關鈴記譜牒一併無踪撫今追昔實爲痛心故吾曾大父文華公感慨先世生沒之異德澤之深恐後之湮沒無聞畧書其概及傳遺之詞以示巔末於後凡我宗氏讀斯傳味斯言亦可以見祖德之深而知垂範之旨矣乾識於誠正齋中

御史公行畧

寧三諱志道字懷明義一府君長嗣也才能明敏剛毅不屈我明國初做漢舉行誼辟授湖廣巡按御史清廉耿介不避威權未幾而貶遷邊境卒於宦庭惜哉海天雲萬里華表月三更謂之忠直良吏也允宜年弟柳富撰

海陽公孝義傳

公諱志遠字懷寧號靜齋義一公次子自幼器度淵深雅好清逸兄弟篤於孝友洪武壬申年詔舉行誼欽選山東濟南濱之蒲臺知縣公則清弊簡刑私謁不納吏無舞文民樂其業告辭歸閑百姓哀挽不留永樂元年復擢廣東潮之海陽縣尹益勵前修魯邑絃歌再聞

粵東之地召伯棠陰貽民去後之思心慕林泉引年乞致行李蕭然惟多贈別之文海民涕泣隨行抵暮而返二邑思公並立碑祠於鄉以祀之既歸宗社□□門表獎忠廉之第公念宗祖之德編著宗源譜牒系傳家範二卷垂裕家居二十餘年敦尚樸素絕跡公庭夫二任司牧廉節勤政而於先人之業未嘗少增拓也惟曰吾以安遺之每痛長兄遠謫邊地輒動雁行之悲聞兄訃至號嘆曰手足異處何以生爲欲往護喪老阻數千里之外終日望天慟哭而享年八十公先故物矣予也忝同郡邑又屬葭莩之末曷可無一言以附驥其諸宦績具存卷軸不悉惟述其概以彷彿之云麟溪眷弟鄭叔高拜撰

孝友傳

公諱志遠字懷寧別號靜齋處士義一公之少子也天性純篤穎異不凡自幼即以孝友聲聞洪武壬申詔舉行誼選山東濱州蒲臺知縣清弊簡刑惠愛其民尋以父病堅懇歸養土庶擁道攀留如失所怙永樂元年準承事郎復擢廣東海陽縣尹政修民樂戶盡絃歌終以母氏年邁疊申乞致滿道清風多攜文以贈別甘棠遺愛著碑祠於鄉亭既歸宗社寵賜花門表獎忠廉之第公念祖德淹晦編著宗原譜牒系傳家範二卷憫里中子弟愚昧義塾敬延文行士以課之且親督教不倦從兄志仁等一十三人家無一籍田不租山不稅者二十五年凡諸親戚孤貧代爲婚娶者五助之嫁者六所資以成立者四他若嗽嗽而待炊者疾而待醫者死而待葬者力所能爲初未嘗袖手而漠視也里居之北險仄多阻約有八里餘行者甚苦公

出已帑糾石工伐突培圩甃砌成夷經二期有零始落成故今鄉人咸名之爲邵賜塢云正統丁巳冬公方過甲子率僚友奉觴稱慶公黯然蹙額而辭曰吾先考妣以長兄御史志道遠謫抱痛而亡此終天之慟也昔程子有言人無父母生日當倍悲痛且長兄罹變乃置酒爲樂予心何安衆共嗟異而罷越七年御史君訃至公號泣曰手足異處情難自禁即欲親往護柩歸里諸子以父曰薄西山且途隔數千里力爲勸阻不勝哀痛其孺慕友愛之誠老而愈切如此甲戌夏公壽七十有七治命考終四子長明次良三傳幼興侍牀帷惟以無違祖考之遺訓是囑他無所及殆所謂至性不易者歟余屬至戚稔知公之行誼因爲之傳是更有望於後之樂善聞幽者時景泰五年歲在甲戌之秋賜進士第中順大夫知漢陽府眷弟傳大有拜撰

處士希正行傳

公諱文中字希正別號景巖生質挺秀穎悟不羣讀書展卷輒洞大意少長經史綱目咸皆通徹性理通鑑靡不博覽非所云出類拔萃者乎公雖不得志於士林而尊取賢善睦族厚嫻則藹如春風中至歲積之餘生殖之饒公不獨私其有而能與衆共之初未嘗一失於計利更喜道人善惡談人過是善者勸而不善者亦興遐邇因以賓服厥考廷餘妣金氏勤勞任事用光世業公執子禮惟謹迨配吳氏敬事彌殷故考之未歿也順養其志及其既歿也哀毀骨立水漿不入口者數日三禮罔有缺失友愛三弟折產讓腴且兄道而實兼父道及之暇日稽閱六世祖海陽公還籍事蹟蹇於正統十四年己巳失守秦熾再於嘉靖庚戌二十九年復遭祝融之災譜牒煨燼止存

海陽公宦囊譜稿手卷及二三修草底內載始祖諱鸞自嚴陵烏龍山之桐江遷於浦東嵩溪慨子姓興替無常舊牒散佚脫不繼先人之志以紹其餘是使親者失於疎卑者踰於尊欲其喪相弔冠相慶貧相周孤相恤者詎能得乎況百世而下孰從而知夫木之本水源哉非惟獲戾先靈抑且負罪於名教迺以會諸宗派議行銓輯有人房處士諱文華字希盛者樂同是舉爰共晨夕續修宗牒不辭寒暑校正故底其事闕則闕之其名存則存之訂成一帙名之曰嵩溪邵氏宗譜俾世世子氏展帙而瞭若指掌焉噫希正之主輯希盛之校編功詎不偉歟詩曰無念爾祖聿修厥德二公之謂也而公能爲子孝爲兄友爲孫敬與人和允矣一鄉儀表芳名並峙蓬萊予嘉公志之誠聊罄鄙臆畧抒端末以爲之傳時大明萬曆乙未春上巳日邑廩生眷弟張尚志謹撰於靜齋

孝友傳

府君諱廷祿字克俸行成十四乃茂九翁之少子思八公之玄孫即海陽尹公人派第六世孫也公懷負大志果勇義爲恐污同儕俗不屑以身之皎皎投世之汶汶夫何早喪其恃哀慟形求每覺啼鳥之失聲值繼母不恤而迭罹棄機公怡顏曲順斯須不忘其敬冀倖分慈鄉人莫不以孝稱又其伯兄性暴恣橫家產落盡以及庭堂公獨不忍以祖宗之世業落於豪門多方幹旋致強齊之汶田來歸我復斯雖大道之不負責實我公義勇以幹蠱拓業營建不然詎能復振於瑣尾之秋乎且敬事伯兄至老如初躬承世業而勤補之廉養之因材任使則家不勞而倍裕更友善親賢惟以讀書課其子守素循理

常崇善行克其私即居鄉族之中未嘗少與人忤時而植松修竹優游自適不復聞外事矣故隱賢逸士多禮貌焉公懸弧嘉靖甲申春三月二十有四日仙遊於萬曆壬辰秋九月十三日考終正寢配柳氏安人懿範可宗而式也子男三曰文榮文華文富皆克肖而仲君俊逸邁倫尤非池中物子女三適傳適陳適祝咸右族也蘭芽奮起英英十餘輩未艾悉謂公之垂休鴻且鉅矣時大明萬曆二十三年乙未春社之吉邑廩生張尚志拜撰

嵩蘭三宗世德傳序附小引

敏胥湖人方弱負笈武林得與婺之浦邵君汝元講道相爲麗澤規勉契合金蘭雅聞其先輩海陽尹公清廉操節至於今民猶稱誦之不衰宜爾振振公子衍派三才居嵩與蘭繩繩今並懋也歲在庚午之秋吾友汝元適讀禮修乘每索三宗之行狀而竟失之迺述其所聞之概示敏曰祖無善而空譽是誣祖有美而弗彰爲忘欲揚休而勿請名筆則爲褻夫誣固不孝而忘與褻爲更不孝吾先祖多長者行以元不肖故幾湮沒願公惠渥一言以續不朽然敏雖非與汝元學業相資素重張范之義詎容已於言乎夫型儀雖不得於生前而口碑亦可傳諸身後故劍氣寶光越千載而彌著也爰以聞其所聞而各傳其所傳云

天派海陽府君之孟子思四公行畧

公諱道明字宗賢洪武甲戌重九乃公初度之辰賦質醇厚篤於親而友於兄弟幼隨父宦遊以歸食指百餘而公主家政克勤克儉纖

無所私事上畜下一無異言且飭己以謹而待人以寬宗黨稱孝友稱仁厚非諛也是其積中發外有以夫配蔣氏生子曰德勝孫曰永通永達顧以名義思之固屬跨竈之英奇實兆世緒之蕃衍也已

地派思六公行畧

公秉性敏達樹品堅貞博聞強識和氣溢於外愛敬根於中見事察理聞義果爲不屑屑於較長論短不瑣瑣於案牘煩文惟竭誠以供子職雅奏壎篪之曲調和琴瑟之音俯仰極天倫之樂而無慕乎人世之榮以視夫奔趨於形勢者大不侔矣公諱道良字宗能配張氏生子六曰德璋德貴德富德榮德華德玉孫男十餘繩繩祖武光大於門期爲將興之慶云

人派蘭塘思八公行傳

公諱道興宗爽其字雁序其四迺人派遷蘭之始祖海陽府君之季子也稟豪邁之質而負超軼之資雖生長宦門親親長長靡不稱職至怡怡昆季間而何尤之古稱馬氏五常白眉最良惟公似之故柳公富一見妻以女而屬之館甥熊祥者四命曰文曰明曰濬曰喆子而又子一十有四然公孺慕友愛之真衷勿以有室有子少變於其初及其後肇創洪圖蘭塘擴業何嘗以多金自累也跡其生平行誼孝爲子道敬爲弟宜讀書不求聞達貽謀只在耕讀內屏機心外絕詭行大都由海陽尹公義方中成也敏後學才疎惟因公孫汝元君之所述者傳之備次三公之畧以俟高明之潤色焉時崇禎三年庚午秋九月賜進士第文林郎年家晚生江俞敏頓首拜撰

松川碩隱傳

隱翁幼廩穎資綽然偉器迨就師席善記憶工文詞咸謂圖南有望而每爲主文者不售時也命也於文乎何尤遂韜光匿彩適志澗槃乃禮在而守義在而爲竭誠以事親和謹而處世重然諾慎藏修卑以自牧治而無錯敬宗睦族輯譜尊先賑孤恤寡善用其財誠四維克張而慎獨者之碩人居恒惟孝友讀書課子以詩禮期以己之弗獲申者申於厥嗣而伯君應亨主司家政即弗畢志與業富於藻詞仁厚謙恭謹飭雅淡和處衆禮優賓睦宗恩恤困光昭先德遐邇欽承允稱跨竈仲君應秋果不辜所望而爰採泮芹歷戰闡棘雖弗克展大志而公之心稍慰矣季君應佐敏捷宏才辭傾峽水萬里雲程指日騰達卓犖果爲剛柔克濟其殆不忤不求不茹不吐者由是令名宣著邑侯莊公屢辟賓飲堅謝不赴而請益堅勉就賓筵匾曰椿桂齊榮更達諸郡守周侯侯按諸實踐而強之上飲匾獎二尊達望厥後曾公又扁云盛世嘉弟其先見禮於莊公也或遇途而傾蓋或公見而授餐霞祝松稀傳稱盛事大爲鄉邑士紳之所膾炙人瑞非直羽儀鄉曲而實郡邑師表也夫碩德者成十四翁之仲子諱文華字希盛松川其別號焉時大明崇禎庚午仲秋之吉江西安吉廣文傳用寶拜撰

張母懿德傳

邵門張母乃碩賓號松川處士之淑配也秉式姆訓德言雅習於幽閨精嫻內則婉孌恒稱於師氏迨歸處士承之以順將之以敬恭執

子婦之禮謙行娣姒之和齊牢修榛栗之文降阼盡蘋蘩之節躬親中饋夙夜毋怠賓爾籩豆載酒斯馨若乃鄰婦告乏不吝脫簪周急夫友儕來無難解佩贈衣何嘗形於言介於意以故處士日與端人志士相淬勵德業精進行誼醇良即弗上國觀光而芳名盛德宣布遐邇瑞毓三鳳和丸秉教香拂芳蘭以母兼父嚴而愛行俱成偉器或以儒顯或以儒隱雖出處不齊均足增輝嵩嶽之風羨美蘭塘之世也且相夫子以正作嘉賓於郡邑安人亦與有光吁張母逝矣其闡範徽音更誰與儔夫子與三君世相資善茲當賢仲允汝元繼志葺譜丐予言然予稔聞之而勿言恐懿德終於無聞遂詹詹掇其實而爲安人之傳時大明崇禎三年庚午秋既望之日邑庠生眷侍教生傳宗頤謹撰

張母節操傳

伯母文法公之續配也出自名裔夙嫺姆訓年二十一歸我伯父敬事無違勤紡織警鷄鳴侍舅姑惟謹相夫子以廉伯父得以勤儉而有成正直平施典禮不愆時莊侯旌之曰善蓋一鄉亦伯母內助之力也既而伯父抱病伯母年止三九調劑侍膳刻不少怠且衣不解帶者年餘弗愈乃卒遣孤子鈿撫而呼曰胡然而天奪之速吾未亡身奈此孤何則屏鉛潛閨夙興夜寢惕勵憂勤拮据針治練之外別無他念雖履茹荼猶能以義方訓子子亦克承父志謹厚謙恭而力爲家計以振箕裘鄉族咸謂張母之賢能善成夫志也厥爾蘇侯來以節操之獎噫伯母之冰清孀境三十餘年優游蔗節竹孫遶前詎非天厚之報歟倘一日榮膺國典並列古節婦傳與之爭光日月而亦

無愧也已時大明崇禎三年庚午宗姪應秋拜撰

柳母節行傳

地房文信公之配柳門淑媛嬪我族叔事上以孝以順妯娌以謙以和內主中饋習於勤安於儉外相夫子謹言慎行毋怠與荒勿易而錯鄉族稱為長者此亦安人成之也嗟夫髮光正鑑文信公歿幾欲殉身地下衆慰復甦哀毀盡禮即縞素隱悲淹踪閨闔致力女工易粟而餐更緝繡供讀訓育三男勉承父志長子佳履正志直繼乃父風踰弱而解紛息爭不煩片語以服許平故人有不釋者咸質成之邑侯蘇公匾獎云德重鄉評素非安人之善教曷克致耶且孀居二十餘年沐不膏齒不脣未嘗縱步庭除與羣婦語即方之柏舟何以過茲故蘇侯以冰霜節操旌於門則安人之清譽膾炙鄉邑孫枝茁蘭他日特來恩眷以頤不老之年永爲吾門之範不於茲更有望耶時大明崇禎三年庚午九月之日宗姪應秋謹草撰

文學公汝元孝子傳

公姓邵應秋其諱汝元其字兌完其號迺碩隱翁諱文華之叔子也英敏天成恪遵庭訓諸凡經文罔不博覽才分八斗堪步魏植之塵筆掃千人可參杜陵之席鄉黨咸謂昌厥邵門者必斯人也年二十有二司衡李公賞議標首芹宮歷膺考最食餼於庠戰棘闈者再數而不售士林爭爲不平公則自視欣然而惟養志天親友於兄弟益敦文行而望重一時飭躬嚴謹而公恕接人於鄉於邑咸思覩其眉宇故邑侯莊公尤加器重及尊翁逝世躑躅哀戚動人慟而絕者數

廬墓三期飯蔬寢苦未嘗須臾離柩側事死如生更不欲人知人聞然精誠格物邑侯曾公乃以孝奏壘篋揚之非至孝詎能致是奈天豐其德而嗇其年比母升遐哭躑躅哀痛如有所失倚閭之下繼先草譜方期之月公亦仙遊殆謂抱泣松楸之靡文何如相從地下之爲樂故遂捐塵世追隨靈爽諧歡蒿里殫厥夙心公蓋不世士哉要以公之容雖不可復覩而公之名則應與華泮並矣又奚必紆青紫壽彭錢而始侈不朽耶是爲傳時大清順治十五年戊戌仲秋江寧眷弟童廷觀拜撰

洪氏苦節傳

洪節婦者父族海塘來歸於蘭塘邵公諱應龍字汝化孤而貧洪氏佐以勤儉無非無儀禮敬勿違相得甚歡無何遽失所天氏年二十有八遺子元陽甫能食洪氏號慟貸資具殮矢志靡他撫孤不以涼薄貳志值歲侵不筭鄰姑憐而諭之他適節婦嚙指誓曰以孤幼忍生俟子立以從夫穴吾何顏於再乎乃封髮晨興夕作紡紉以給訓養勉子持家婚娶事畢而元陽遵訓拮据操持動無逾禮執意天齋其養節婦週甲之際子婦繼逝遺四孫幼僅能行嗚呼向承夫志以攻苦今復爲子志而茹辛矣且節婦之孀潔冰清自邇及遠一無間言既成子善又撫孫賢克治三喪而治家能裕詎僅孀守一節者儔耶於今壽八秩矣雖不能達諸當寧以揚其懿德然質之婦道不既全乎余家距北善友其族之叔氏天衢公得稔聞其苦節之操故不辭陋劣爲撫其概少表萬一以傳云時大清順治一十五年戊戌春月之吉眷侍教生張國憲九如氏撰草

又傳

公諱子佳字汝美別號仰源汭東端人也賦質雅重器度淵宏不妄言笑而樂取人之善俯仰之間行無不可以對人言雖非道義一介不苟取與自律之嚴確乎其不可拔也公少孤孝奉母氏不違其志督婦以敬課子農桑務於勤務於儉務於操作而有成友愛二弟過相規善相勸而不私於身讓腴取瘠以怡同氣之光至遇公解紛慨然肩之不瑣瑣於錙銖他如富貴之場利達之府公何嘗留心於其間哉暮年優游歲月惟掃徑蒔松日與二三知己較晴量雨講古衡今樂含飴外不復與聞矣故三侯遞守是邑而四旌其善迨夫壽齊嵩嶽桂發蘭堦鄉邑士紳或貢文於瑞軸或親祝其霞觴斯非盛德之所致歟夫才嗇於余勿能盡述公之長故畧爲詮次以示後之徵諸時大清順治歲次戊戌一十五年夏四月宗弟汝良撰草

世德傳

岳父諱應亨字汝通別號天衢雁序英二十四廼碩隱府君之孟子公少敏爽致力文詞以孝友聞於鄉族既壯幡然起務家政勉三弟於學欲大就之爲破資禮師賓以發其材善養其親之志曲體其親之心行內修不標飾爲名而有譽於爲士者顧其敬老慈幼親賢友善與人交恬如也迨夫碩隱翁晚抱一疾調劑侍膳湯必嘗帶不解者二期憂憤願以身代之一夕革公哀慟僕地水不下咽者累日具以禮歛以誠哭泣之哀竦感疎戚及至葬戒謹終喪躬承家務俾諸弟讀禮廬墓三年時曾公旌於第曰孝奏壘篋夫公心父之心事父

之事造就諸弟而仲氏應秋英英舞勺已作宮牆之領袖旋試浙闈聲聞盛著雖大志未售而爲兄之道盡矣至友愛季弟爲彌篤治業倍裕而斗尺一無所私拆產以瘠自處故親衆多義之目軫恤解紛並不顧計凡力所能及者未嘗袖手而空懷憫惻也於今嘖嘖稱公趨存淳古無不可以式諸子孫也安人黃氏內則順正閭範咸周不期早以祿終生二女次適同庠族兄傳希益幸公不鄙而以長妻杏繼娶傅氏賢淑不忒生子男二幼曰元柱學成而不穀長曰元棟稟性端毅甚有祖風克承先志創業不藉乎前人成功悉出於自力鄉人多以長者稱孫男良乾遜敏就傅類蓋不失曾先遺意孫女有二長適邑庠張德禮次適杏比兒邦久公歷年七十有五夫公之壽福若是然公德之足紀者不可殫述杏也嘖不敢妄爲溢美惟舉平素之稔彷彿以爲公傳附姚宗文先生贊公像曰氣度寬宏襟懷瀟灑於欲無求於忿不忤秉心塞淵而不私其善布德施義而不炫其名噫嘻公殆一鄉之善人歟美丹青者能肖其貌而不能肖其心時大清康熙戊辰春和之吉壻男傳希杏謹識

英七十八行傳

公諱子佑字汝啓號愛源元五十一翁之少子也秉性醇厚受命不遷跡其生平或盡子道或敦弟職或尚友誼無不可見公之行其治家也既務於勤復節以儉諄諄庭訓必導諸禮義之鄉且衣不絲綿食不重味交接不友荒佚之朋故與人處淡然自適也時順治丙戌間旱魃災行鄉鄰半困於無策公則倡義破金減家給以一賑再賑焉以視惑於陽虎之爲仁者相去何如哉邑侯范公匾曰義賑高風

此其行良足以挽末世也夫配徐氏內德攸著育丈夫子三長曰淳仲曰潔季曰潛悉凜公訓能紹其緒以自振拔於流俗者孫男七遜敏英奇而季孫良仁尤出乎衆也曾孫男兆二繩繩尚來將衍公餘之慶於源源耳予屬葭末知公之稔敢約所聞序其概焉謹傳時大清康熙戊辰春之上巳邑庠眷生傅希益拜撰

伯清公傳

公諱元深字伯清英五十九翁之冢嗣也素履純樸不喜侈靡少好讀書博文廣記善言懿行每諄諄稱述之課子姪於耕於讀而孝友型於處鄉族以信以忠而言行不渝且非其業勿之修也非其人勿之友也非其可踐之地勿之往也其爲人如此鄉邑紳士咸禮焉而以長者稱其配余族伯姊也徽音足式賢而偕老生子二長曰良樞上續先人之令緒下啓後嗣之嘉謀蓋跨竈奇英也幼良時承訓恭儉類公而勝蘭芽發四曰琦璘瓊璜皆孝謹克篤能自振拔於流俗以有爲者也是蓋我公之盛德而致耶故壽享七十有九以康熙丁卯七月初十日卒距生萬曆己酉十一月十三日今茲公族修乘余族子邦敕述公行於予爲言予固陋而誼難辭謹約所聞詮次一二以爲公傳如云言以人重則吾豈敢時大清康熙戊辰春三月邑庠生眷弟傅希儀拜撰

望源邵公行狀

公諱子京字汝大別號望源乃考元九翁生有四子而公屬之季性淳謹而內介雖合居數十指無少惰容讀書之餘每有善輒進於親

至壯歲里老或勸之曰人不可以逸居須勤樹藝以爲養公於是勤生業廣樹藝不遺余力而家日豐且孝養二親勿因妻子而稍變敬事諸兄不以垂年而少衰折產讓腴惟思所以亢其宗祖然性高雅樂施予畧不以其有自吝爰去舊居之北十數武而第曰竹園周圍墻圍營室於其中竹木菓蔬時修而游息噫其無懷氏之民歟抑葛天氏之民歟初婚馬氏早世無育繼配趙氏有賢明之行凡公孝友勤儉及周貧恤匱諸義事皆力贊公爲之育子男三長元義次元道季元通怡怡克家爾昌爾熾殆慰公志於九原者也夫子不敏謹次見聞之實遺爲狀如右或奕葉之後有因斯言而想見其人則公雖死不朽焉時大清康熙戊辰仲春和日眷侍教生趙如珩頓首拜撰

邵公汝廣傳

珪舅氏諱子鉅字汝廣者敦素質直擬其品不減渾金察其行寧爲方皂有汙尊杯飲之風有傾肝吐膽之意至其立心鯁直每面折人過而不諱則氣度醇厚人亦不之怪即怪之亦有所不計也故爲一鄉祭酒安人義邑孫氏不事鉛華甘爲挽鹿可稱德配後公三年而生亦後公三年而卒子育徐卿元洲元浦兄弟兩難公之父雁行居七人之季而公亦如之洵爲克繩祖父雖懿行難以枚舉而一時之轟耳者大約如此公距生於萬曆丙午秋七月廿八日寅時享年七十有二卒康熙丁巳冬十一月廿二日寅時合葬陶塢坐辛山乙向而安焉其昭穆行次適值英字八十時大清康熙戊辰二十有七年春三月廣東州吏目甥男項元珪頓首拜撰